

13. oktober 2015

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa suleqatigiissitamik susassaqtunik attuumassutilinnik inuttalimmik pilersitseqqullugit, taassumalu suliasarissagaa nunat pineqartut pingasut killeqanngitsumik niueqatigiinnissamik isumaqatigiissuteqassappata nunanilu avannarlerni killerni niuernermit siunnersuisoqatigiinnik pilersitsisoqassappat ataatsimut pissarsiarineqarsinnaasut nalunaarsornissaat. Suleqatigiissitamut suliasaritit minnerpaamik ukuninnga ilaqassapput:

- **Nunani avannarlerni killerni killeqanngitsumik niueqateqarsinnaanermut isumaqatigiissuteqarnerup imaluunniit nunat marluk akornanni, soorlu nunatta Islandillu aamma nunatta Savalimmiullu akornanni, isumaqatigiissuteqarnerit iluaqutiginnaasai ajoqutiginnaasaalu nalunaarsussallugit.**
- **Killeqanngitsumik niueqateqarsinnaanikkut nunat sutigut iluaqutissarsinnaanersut sutigullu ajoqutissarsinnaanersut nalunaarsussallugu.**
- **Nioqqutissat, sullissinerit, aningaasat innuttaasullu killeqanngitsumik nikerarsinnaatillugit ataatsimut aningaasaqarnikkut suleqatigiiffiortoqarpat tamatuma iluaqutiginnaasai ajoqutiginnaasaalu nalunaarsussallugit.**
- **Nunat pingasut akornanni killeqanngitsumik ammasumillu niueqatigiissinnaanermi periarfissat aporfissallu suussusersiniarlugit nunat avannarliit killiit niuernikkut siunnersuisoqatigiiffiannik pilersitsinikkut iluaqutissat ajoqutaasinnaasullu nalunaarsussallugit.**

(Aallartit siulittaasuat Lars-Emil Johansen)

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutaat nunat pineqartut pingasut akornanni killeqanngitsumik niueqatigiinnissamik imalimmik suleqatigiissitamik susassaqtunik attuumassutilinnik inuttalimmik pilersitsinnaanermut sammititaaq Siumumiit imaattumik oqaaseqarfigissavarput.

Nunarsuarmioqatitsinnit issittup soqutigineqaleraluttuinnarnera Siumumiit arajutsisimangilarput, nunarsuullu immikkoortua Nunat Avannarliit Killernik taasakkagut aatsaat taamak suleqatigiinnissamut pisariaqartitsinerat annertutigaaq – tamanna aamma niueqatigiinerup iluani.

Nunat sanilerisagut, tassalu Island Savalimmiullu amerlasuutigut aningaasarsionnikkut niueqatigiinnikkullu suleqatigineqarsinnaanerat periarfissarissaartutut isumaqarfigineqartarpoq. Taassumallu nunanut taakkununga pingasuusunut periarfissatigut qanoq inissisimanagera siunnersuut manna aqqutigalugu qulaajarniarneqarmat Siumumiit pitsaasutut isumaqarfigigatsigu matumuuna oqaatigissavarput.

Suleqatigiissitamik susassaqtunik attuumassutilinnik inuttalimmik pilersitsisoqarneratigut Nunatta, Islandip Savalimmiullu akornanni killeqanngitsumik niueqatigiittoqarsinnaaneranik periarfissat iluaqutaasinnaasut ajoqutaasinnaasullu qulaajarneqartussaassammata siunnersuutip tassuatigut pitsaaqquteqartussaanagera Siumumiit takorloorparput.

Siunnersuutigineqartutullu nunat taakkua pingasut akornanni nunat marluk akornanni, soorlu nunatta Islandillu aammalu nunatta Savalimmiullu akornanni isumaqatigiissusiortoqarsinnaappat iluaqutigisinnaasat ajoqutigisinnaasallu nalunaarsorneqartussaanerat Siumumiit pitsaasutut isumaqarfigaarput, tassami nunatta nunat tamalaat akornanni niuernikkut aningaasarsiornikkullu pitsaasumik patajaatsumillu inissisimajuarnissaa aamma qulakkeersimaneqartuartaqarmat.

Nunatta, Islandip Savalimmiullu akornanni niueqatigiinnerulerneq qularnanngitsumik illuatungeriinnut tamanut suliassaqtitsinikkut, ineriartortitsinikkut kiisalu aningaasaqarniarnikkut pitsaasumik kinguneqartitsisinnaanera naatsorsuutigisariaqarpoq, pingaartumik nunatut immitsinnut qanitariinnerput eqqarsaatigalugu. Taamaakkaluartorli suleqatigiissitamik sukumiisumik qulaajaasusamik suliqaartitseqqaarnissaq tamanit orniginarnerpaasutut Siumumiit isumaqarfigivarput, tassuunatigummi nunanut ataasiakkaanut iluaqutissat kiisalu suleqatigeeriaatsit suut pitsaanerpaasanersut erseqqarissarneqarsinnaassammata.

Nunat taakku pingasut nunat tamalaat akornanni niuffaffinnut tunisassiaminnik aamma nalittorsaasinnaanerat tikkuarneqartunut ilaavoq, taamaalilluni nunarsuup immikkoortuani Nunat Avannarlerni Killerni inuussutissarsiornikkut aningaasaliinissamut kiffartuussinissamullu isumaqatigiissusiorsinnaanerit aamma periarfissarissaarnerannik kinguneqarsinnaalluni.

Nunanut Avannarlernut Killernut alloriarnerusussaavoq pingaartoq issittumi soqutigisat pisuusutillu ataqatigiisaagaasumik sammineqarlutillu qulaajarneqarnissaat, taamaalilluni nunat taakkua pingasut akornanniinaanngitsoq, kisiannili nunarsuup sinneranut pisuussutitta nalituut ataatsimoorussamik iluaqutinngortinneqarsinnaanerit periarfissarsiuunneqarsinnaammat.

Taamatut Siumumiit oqaaseqarluta siunnersuut akuersissutigineqassasoq inassutigaarput.

Anders Olsen, Siumut.